



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 7

Yangia anidakangma :



Tir Yimiyim



tir_yimiyim



tir yimiyim

TAPAK 8

Brazil tzumetsung aser anentsuh lendong nung nisung 30 asu

Afghanistan Cricket Board-i head coach tasen shimogo



VOL. XXIII ISSUE NO. 134 (ADOK 134) DIMAPUR YANGTEPNÜ (THURSDAY) TSÜKLAI (FEBRUARY) 26, 2026 ₹ 5.00

DoSE-i SSA & RMSA tesayurtem itasen jangjashitsür Tang mezüing atema NLA Budget Session shilem ana agitsü

Dimapur, February 25, 2026 (TYO): 2010 aser 2013 batches nungi Sarva Shiksha Abhiyan (SSA) aser Rashtriya Madhyamik Shiksha Abhiyan (RMSA) tesayurtemi lungkak aitba atema School Education Department-i osang jangjashitsüogo aser sorkari dang itasen atema lemtet agitsü ashi sorkar mapa inyakertemi agitsü makok ta parnokisa shiogo.

2010 aser 2013 batches nungi SSA aser RMSA tesayurtem ya SSA aser RMSA nung Centrally Sponsored Schemes (CSS) kübok shimokba lir aser parnok itasen ya India sorkar ajanga agitsü ta Department-i Bodbarñu sangdong ka nung ashi.

Ajisüaka, recruitment advertisements aser appointment orders ji CSS telatetba nung SSA/RMSA kübok shimokba ama masüba agi tesayurtemi parnok State School Education Cadre nung dendaktsütsü takhangba agüja liasü ta Department-isa ashi.

State Cabinet-i mulunga agizükba sülen Personnel & Administrative Reforms (P&AR) aser Finance Departments nungi temelaba ngur parnok open recruitment process ajanga mapa nung anio. Iba nung ajemdaker Nagaland School Education

Service Rules, 2017 kübok criteria atonger tesayur 2,293 tashi September 2, 2022 nü State Cadre nung anioka liasü ta Department-isa jangjatsüogo.

Item SSA aser RMSA tesayurtem tang tesüsabuba Revision of Pay (7th ROP) angur aser scale pay o tanga entitlements ajak agir. Parnok ya State Government employees tetuyubatem ajanga ketdang asür ta Department-isa ashi.

2010 aser 2013 batch tesayurtemi Non-Plan Budget kübok State Account Head nungi itasen agütsütsü akhanger aser ibaji Department ket tonger bangdakpur dangi benogo ta parnokisa jangjashitsüogo.

Iba dak sendakba nung School Education Advisor Samagra Shiksha, School Education Department aser Finance Department ketdangsurtemi June 3, 2025 nü tesayurtem den ajurutepa sensaksemogo.

State sorkari mapang shitak nung itasen agütsütsü aser nungdakba budget enoktsü meranga arudar. Anungji state sorkar mapa inyakertemi parnok itasen angutsüba Budget Head of Account meshitsü temeten mali ta Department-isa ashi.

Kohima, February 25, 2026 (TYO): Nagaland nung March 2 nungi tenzüka tang mezüing atema Nagaland Legislative Assembly (NLA) indang Budget Session shilem ana lemsar agitsü.

Iba ya 14 buba Nagaland Legislative Assembly (NLA) atema tibuba session aser 2026-27 atema Budget Session alitsü.

Iba ya Naga People's Front-i anir party ajak sorkar indang mezüingbuba Budget Session asütsü. Külen, Centre, State aser Eastern Nagaland Peoples' Organisation (ENPO) tsüingda Frontier Nagaland Territory Authority (FNNTA) ateam tenanzüktep agiba sülen mezüingbuba NLA session asütsü.

2023 Assembly election nung Nationalist Democratic Progressive Party (NDPP) aser parnok den yariteper Bharatiya Janata Party (BJP) ajanga menden 37 nung takok ngua liasü. NDPP-i menden 25 aser BJP-i menden 12 angu.

Maneni, Nationalist Congress Party (NCP) ajanga menden 7, National People's Party (NPP) 5, Lok Janshakti Party (Ram Vilas) 2, Naga People's Front (NPF) 2, Republican Party of India (Athawale) (RPI-A) 2, Janata Dal (United) (JD-U) aser 1 Independents 4-i takok angu.

Ajisüaka, yaküm May ita NCP MLA tenetprongi NDPP nung

aden aser iba ajanga züingsem 60 agi akümba assembly nung NDPP MLA 32 küma 'absolute majority' liasü.

Iba sülen yaküm October nung NDPP-i NPF den ka küma loktep aser küm ti lir külen NPF-i maneni sorkar yimsü asütsü tashi angu. NDPP-NPF ka küma loktepba ya Naga yimten tekaraba nung latetsü atema lir ta ashi.

March 2, 2026 nü Governor's Address ajanga Budget session Phase I tenzütsü.

Phase I nung session pungu alitsü aser item session tsüingda anogo pungunü recess aser soditem alitsü aser ibaji March 12 tashi agitsü.

Assembly Secretariat ajanga sangdongba provisional programme nung March 3 nü tasüingdangbatem agizüktsü, Bills agizükba indang osang lemsateptsü aser Motion of Thanks atema o atsüteptsü ta shia lir.

March 4 nü sodi asütsü aser March 5 nungi 7 tashi recess alitsü. Külen, March 8 anogoji sodi lir.

March 9 nü session maneni agitsü aser idangji tasüingdangbatem langzüksütsü, urgent public importance onüktem lemsateptsü, annual administrative reports aser tanga papers benoktsü, committee reports lemsatepts, government and private members' Bills & resolutions sayatsü aser Motion

of Thanks agizüktsü.

March 10 nü Assembly nung maneni tasüingdangbatem langzüksütsü, olemteptsü, private members' & government Bills agizüktsü, reports benoktsü aser bangzüngtem renemtsü. Iba sülen March 11 nü recess asütsü.

March 12 nü House-i maneni tasüingdangbatem langzüksütsü, public matters lemsateptsü, reports benoktsü, committee reports lemsateptsü aser government Bills o resolutions agizüktsü.

2026-27 atema State Budget benokba sülen Phase II tenzütsü aser ibaji Phase I tembangba anogo nung detailed programme agütsütsü ta NLA Secretariat-isa metetdaksüogo.

Phase II nung C&AG reports, receipts and expenditure, 2025-26 atema supplementary demands, 2018-19 aser 2019-20 atema excess expenditure indang regularization, 2026-27 atema demands for grants aser Nagaland Appropriation (No. 4) Bill, 2026 agizüktsü.

Chief Minister Neiphiu Rio-i iba phase nung 2026-27 atema Budget benoktsü aser iba sülen olemteper agizüktsü.

Tan budget session nung FNNTA agreement aser Kohima o Dimapur nung nisung kari Nagaland Liquor Total Prohibition Act, 1989 agientsü akhangba onüktem benoktsü imlar.

Sekrenyi-cum-Mini Hornbill 2026 amung

Dimapur, February 25, 2026 (TYO): February 25, 2026 nü Sovima Village Council Ground nung Sekrenyi-cum-Mini Hornbill 2026 mungogo.

Iba sentong ya Sovima Angami Organization ajanga ayongzük aser Tourism Department, Nagaland-i teyari agütsü.

Sentong nung Tourism & Higher Education Minister Temjen Imna Along-i tongti tesemdang aser Urban Development & Municipal Affairs Advisor Zhaleo Rio-i tetushi süa jaoker ama shilem agiogo.

Minister Imna Along-i Angami nung den salem lemsatet aser Naga kin balala nungi lennirtem anidena benjung amungba atema tayonger nem tenüingsang agütsü.

Lisopur kintem tsüingda telongjem alitsüsbaji kanga nungdak aser ibala sabangtem ajanga tesentaktep akangshir aser külem Naga maitsü tali tashi itdaksür ta pai ashi.

"Lisopur kintemi Khristan tamangba nung akangkanga tera yanger pei senmang, sobaliba aser libaliro kümbüka ayutsüla. Tamangba aser sobaliba ya tsükchirtem masü. Asenoki asen sobaliba nung kechi tim wazüka yutetsü aser kasa mapang asen tamangba nung akangkanga noktaktetsü" ta Minister Imna Along-i ashi.


"Nagaland atema mapang

talangka tayongzükbatem rongnung ozüing alema arurtem khuret ya lir. Iba tebilemstü ya tamangba yimsü tsütsü masü saka ozüingren aser asen lisopur temeteten kümbüka ayutsüba tsütsü reprangtsüla. Ozüingi melaba ama arurtem, asen ozüingtem akhümtsüburtem aser asen loktiliba asoshi tajung inyakertemji asen tsükchirtem masü, saka asenok ozüingren akhümtsübusa lidaktsütsüla" ta pai ashi.

Inner Line Permit (ILP) system ya India sensotem timtemdaksütsü atema masü saka lisopur taginübatem kümbüka ayutsü atema tenzüka mapa ka lir. State sorkari Nagaland nung küm aika lia arurtem asoshi policy balala yanglua lir ta Imna Along-isa ashi.

"Olemtep ajungketertem, asangsang asoshi bilemertem aser telongjem adokdaksüba lennirtem asenoki pusema nungitsüla. Nagaland nung mapang shia mepetmesü aser lungkak aiba asoshi tebilemstü abener. Nagaland ya Khristan state ka ta züingshir anungji asenok dak taremzük aser kati ka akhümtsübuba shisatsütem alitsüla. Asenok kin balala nungi lir saka asenok Naga nung ama longjemer alitsü merangtsüla. Telongjem ajanga asen maitsü mesamadaksür saka tashi ang itdaksür" ta Minister Along-isa ashi.

Mokokchung Police-i Cyber Crime inyaker ka apu



Dimapur, February 25, 2026 (TYO): Mokokchung District Court nung staff kati ken o benokba sülen bushitepa arudang Mokokchung Police-i Shillong nung Anupam Kumar Singh ta ser cyber crime fraudster ka puogo.

Mokokchung District Court dangi email ka nung "Judicial Magistrate First Class, Mokokchung" tenüing nung taila court order ka aru ta ken o benokba nung shia lir.

Mokokchung nung Judicial Magistrate First Class mapa mali aser iba kulikaket nung taila seals aser stamps enoka liasü. Iba ken o anguba sülen Mokokchung

Police-i bushisüingdang tenzüka liasü.

Court ketdangpurtem dang asüingdangya asüingdang kulikaket nung enoka aliba court orders, seals, stamps, aser designations ajakji tiyazü aser District Court ajanga kecha magütsü ta osang angu. Iba jagi Mokokchung Police-i IT Act kübok ashikülak mapa inyakba ken o ka benok.

Police-i technical analysis asüba, call detail records repringba aser bank statements jangiatepdang temulung meleme bilemba nisung ya Shillong nung lir ta tsüingsü bushiteta liasü. Iba jagi SDPO (HQ) Aekant Jain, IPS aser OC PS-I Vikeheto Kennao na lenisüba kübok Special Investigation Team (SIT) ka tentet aser parnoki Chief Judicial Magistrate, Mokokchung nungi temelaba meshir Shillong-i ao ta PRO, Mokokchung Police-i sangdong ka nung ashi.

SP East Khasi Hills aser SP Shillong (City) teyari agia police-i Anupam Kumar Singh apu. Pa ya Siwan, Bihar nungi lir aser Laitumkhrah, Shillong nung telidak lir.

Police-i bushisüingdang

asüingdang iba nisung yagi cyber fraud inyakba bushitet aser pai OC PS-II Mokokchung ajanga agütsüba ama taila police reports aser taila seals, stamps, o signatures amshia Magistrate First Class, Mokokchung ajanga court orders agütsübatem amshi.

Anupam Kumar Singh-isa bank tem dang tai maketba nisungtem indang account sota ayutsü atema sorkar email ID tim mesü amshi aser pai lapokba accounts nung sen enokdaksü.

Anupam-i nisungtem ket nungi Rs 3 crores tema ashioktüba bushiteta lir aser pa tang Mokokchung Police ket nung yua lir aser maneni bushisüingdang südar ta PRO-isa metetdaksüogo.

Mokokchung Police-isa nübertem dang taila court orders mesüra police tetuyubatem aliba sangdongtem nung tamang makatsü aser ibala osang police dang ashitsü metetdaksüogo.

Special Investigation Team-i kanga dang meranga iba mapa takok ngua inyakba atema tenüingsang agütsür ta Superintendent of Police, Mokokchung-ia metetdaksüogo.

40 Hours Mediation training sentong temogo



Dimapur, Tsüklai/February 25 (TYO): Mediation & Conciliation Project Committee (MCPC), Supreme Court of India kübok Nagaland State Legal Services Authority ajanga ayongzüikba 40 Hours Mediation training programme Hotel Japfü, Kohima nung Bodhbarnü temogo. Iba sentong ya Honibarnü tenzüka liasü.

NSLSA, Member Secretary, Neiko Akami, NJS-i iba sentong tembanga jembidang MCPC, Supreme Court of India kübok Senior Trainers Reema Bhandari aser Rita Das Mozumdar nungeri iba sentong ketdangsuba asoshi tenüngsang agüja liasü.

Tang agiba training ya ajanga Nagaland nung aliba

district shia nungi counsels ana-na mediation nung training agitsü maongka angu, aser court of law ajanga mediation atema yokba ken o tem nung tetsüingtai ia bentetsü imlar, ta ashi.

Ghonda 40 training mapang Senior Trainers temi 'ground rules of mediation, conflict management and resolution, types and processes of Alternate Dispute Resolution, role of lawyers, communication roles, techniques such as negotiating, bargaining, understanding, management, stages of impasse and mediators reflection, professional ethics, ethical principles for judicial mediators, Advocate mediators' onüktem nung ajemdaker shisatsü aser

yimya balala lemsatapa liasü.

Ken o jembi tenzüker mashi mapang angatetteptsü merangtsü asoshi Court mesüra Tribunal-i Mediation Act, 2023 nung ajemdaker maongka agütsüsü.

Mediation training ya Bar nung küm ter tashi nokdakba advocates nem agütsür aser certified Mediator akumtsü asoshi candidates tem 40-hour Intensive Mediation Training Programme renemtsüla koba Mediation and Conciliation Project Committee (MCPC), Supreme Court of India ajanga accredited süa lir.

Nagaland nung district 11 nungi mediators 26-i iba completion certificates agizüka liasü.

IAF-i March ita Agniveervayu recruitment rally agitsü

Dimapur, Tsüklai/February 25 (TYO): Indian Air Force (IAF) ajanga sangdong ka nung, Intake 02/2026 kübok Agniveervayu (Other than Science Subjects) shimtsü atema Open Recruitment Rallies agitsü ta metetdaksü.

Nagaland aser danga North Eastern states nungi temsüa aliba lanirtem iba rally nung shilem agitsü jaokogo.

Osang ajanga ashiba agi, iba rally ya Mizoram, Nagaland aser Manipur nungi candidates tem atema 34 Assam Rifles, Mandir Gate, Zokhawsang, Aizawl, Mizoram nung March 9-12, 2026 anogotem agitsü. Tetsür candidates tem March 9-10 nem report asütsüla aser tebur candidates tem March 11-

12 anepdang 6:00 ako nung report asütsüla.

Ano Assam, Arunachal Pradesh, Meghalaya aser Sikkim nungi candidates tem atema rally ka HQ Eastern Air Command, IAF, Nonglyer PO, Upper Shillong, Meghalaya nung March 20-23, 2026 anogotem agitsü. Tetsür candidates tem March 20-21 anogotem report asütsüla aser tebur candidates tem March 22-23 anepdang 6:00 ako report asütsüla.

Jangra aliba candidate temi official website <https://agnipathvayu.cdac.in> nung eligibility criteria, documentation nüngdakba aser totuyuba balala angutsü, ta sangdong ajangasa ashi.

DoSE-i private schools recognition atema metetdaksür

Dimapur, Tsüklai/February 25 (TYO): Directorate of School Education, Kohima ajanga sangdong ka nung, mela aliba Private Schools (Primary aser Upper Primary) provisional recognition, renewal of provisional recognition aser upgradation aser mela aliba Pre-Schools indang provisional recognition aser renewal of provisional recognition indang

forms ya Department indang website <https://education.nagaland.gov.in> nung upload süja lir, ta metetdaksü.

Item forms ya iba sangdong agütsüba anogo nungi March 31, 2026 tashi angutsü. Anungji ajaki nüngdakba form ya download süa kasaji Department nem mapang shidak nung agütsüsü metetdaksür, ta sangdong ajangasa ashi.

NEPED-i eco-tourism indang state level workshop ayongzüik



Kohima, Tsüklai/February 25 (TYO): Nagaland Empowerment of People through Economic Development (NEPED) ajanga Kohima nung "Empowering Communities Through Eco-Tourism: Conservation, Livelihood and Sustainable Development" atema anogo ana state level workshop ayongzüikba Bodhbarnü tenzükogo.

Iba workshop tenzüka Team Leader, NEPED and Commission & Secretary to the Government of Nagaland, Kovi Meyase-i jembidang, Nagaland ya alinük tebour tajung, sobaliba tabu balala, nüburtem mulungsentsü tajung aser biodiversity teperi moaja lir, aser ajakji senteper wazüka ayutsü aser nüburtemi shilem agiba nung tera yanga eco-tourism

atema nükla tajung lir, ta ashi.

Eco-tourism indang chichiba tashi ya alima repranga senzür atsür aruba kisüing nung masü saka nüburtem nem tashi balaka agütsüba nunga keta lir ta ashi. "Eco-tourism ya nüburtem jenjang ajungkettsü atema gari ka ama kumdaktsüsüla," ta pai ashi aser ali rongsen wazüka ayuba den külemi takum alitsü asoshi lenmang bushitetba sako asütsüla ta shisem.

Ananü workshop nung shilem agirtemi ali rongsen wazüka ayuba den külemi sustainable livelihoods adokdaktsüsü asoshi tasa balala indang jembitsü, state telung nung aser tesem balala atema yimya tajungtiba aser models tajungtiba asadangtsü, policy frameworks indang jembitsü, aser grassroots nung inyaksangshiba tashi itshitsü

atema institution teyari indanga jembitsü.

Kanga junga tasalentong yanglua ketdang asüba ajanga eco-tourism yagi 'conservation' aser rongsenketzung ainba tsüingta tesendaktep tajung adokdaktsüsü, ta Meyase-i ashi. Iba ya ajanga are maser biodiversity wazüka ayur ajungmesotsü, local governance system tashi itshitsü, sobaliba wazüka ayutsü aser lanur aser tetsür entrepreneurs atema maongka tasen lapoktsüsü.

Küm 30 dak tema NEPED yagi nüburtem tiyong südaktsür terenlok mapa inyaka natural resources ketdang süa state nung aliba yimdak yimtsüingtem nung community institutions tashi itshidaktsüba mapa inyaka arur, ta pai ashi.

North Eastern Council (NEC) nungi teyari agüja iba workshop ayongzüikba ajanga North Eastern region nung sustainable development asoshi temulung agüja inyakba sayur, ta ashi aser Council dang pelaba lemsatapa liasü.

Iba mezüing anogo nung Neikedolie Hiekha, Ex-Chairman, Eco-Tourism Management Committee, Khonoma ajanga "Understanding Eco-Tourism: Concepts & Principles" onük nung jembi aser Imlikumba, Senior Project Manager, Foundation for Ecological Security ajanga "Community Conserved Areas (CCAs): Concepts and Principles, and their Role in Biodiversity & Eco-Tourism Based Livelihoods" onük nung ajemdaker jembia liasü.

Linük tesem balala nung NE nisungtem merenshiba aitsür

Dimapur, Tsüklai/February 25 (TYO): Linük tesem balala nung tawa North nungi nüburtem anema mapa tamajung inyakba aser merenshiba Member of Parliament (Lok Sabha), S. Supongmeren Jamir-i sashisashia aitsüogo, ta Nagaland Pradesh Congress Committee (NPCC) sangdong ka ajanga ashi.

Nagaland nungi AIIMS Gorakhpur, Uttar Pradesh nung azünger ka dak teka sangshiba aser ano Malviya Nagar, New Delhi nung Northeast tsür dang o tamajung ashiba osang lir.

Iba ama inyaksangshi ya tatok magütsüsüla aser India ama democratic linük ka nung tebilemstü tulu lir. Tereprangtsü, sobaliba mesüra regional background nung ajemdaker tenük yokba ya linük telungjem aser constitutional values nung aibelenba lir, ta ashi.

temi academic tsütsü aser linük nung sobaliba tesendaktep nung shilem tulu agir aser parnok kong züingdir mesüra inyakdir tetsübo malitsüla, ta pai ashi.

Iba ama mapa tamajung inyaker nem tapet temerenshi agütsüsüla, aji asünung dang tarutsü nung iba ama tanaben mataloktsü.


MP S. Supongmeren Jamir-i ketdangsurtem dang awareness mechanisms, campus safety system tashi itshitsü aser metropolitan cities nung aliba Northeast nüburtem atema rapid grivences redressal channels asendenshitsu ayongzüik.

"India indang tashi ya kin balala nung keta lir. Racial discrimination inyaksangshi ya nisungba dak inyakba kisüing masü saka asen linük indang constitution tanüla anema inyakba lir," ta pai ashi.

Pai civil society, kaketshir tentet aser ozüing amshirtem dang akhumtsübo tesendaktep aser linük telungjem temaba jenjangi ajungkettsü asoshi lungjemer inyaktsü ayongzüik.



Khaushiu Pubic Ground, Pathso, Noklak nung February 24, 2026 nü Chitso Sumai amungba sentong nung Advisor, Agriculture, Mhathung Yanthan-i jembidang tangokba noksa nung angur.



Srinagar, February 25, 2026: Linük tatong Tir, CP Radhakrishnan-i Srinagar semdangtsü lia Jammu & Kashmir Police, Special Operations Group (SOG)-i University of Kashmir campus anükba noksa nung angur.

AI summit nung longkak aiter asem Shimla nung puogo

New Delhi, February 25 (Agencies): New Delhi nung Global AI summit aliba mapang nung longkak aiter nung shilem agir asem Shimla nung pua Delhi-i anir ogo.

Tang tashi nung longkak aiter ajak senteper nisung 11 puogo.

Himachal Pradesh yimtiba, Shimla nung Delhi police-i Saurabh, Siddharth aser Arbaz

nunger apuba sülen yangji aliba local court kati anir oa liasü, iba sülen temelaba ngua asüngdangyatsü atema Delhi-i anir ao.

February 20 nü Indian Youth Congress nung inyakertemi AI summit agiba tesem nung Ato kilonser Narendra Modi anema longkak aiter ajanga alima tsüngdang India tenüng

menüksüogo, ta aikati aitsür.

Iba tatalokba dak sendakba nung police-i Bharatiya Nyaya Sanhita (BNS) kübok Arrla balala nung ajemdaker ken o benoka bushisüngdang tenzükogo.

Delhi police Special Cell-i intelligence osang aser technical surveilliance nung ajemdaker tai tonglokja alir asemji Shimla nung apu.

CPI lenir tain, R Nallakannu süogo

Chennai, February 25 (Agencies): CPI lenir tain aser linük nüchiso atema rarar, R Nallakannu Bodhbarnü alima nungi pilaogo; pa arrshi küm 101 liasü. Pa Chennai nung aliba sorkar hospital ka nung treatment tagidak mapang asü, ta party osang ka ajanga metetdaksü.

Asür nem akhüm agüja Tamil Nadu Chief Minister, M K Stalin-i state ajaki asür nem akhüm agütsütsü tuyu.

Rajiv Gandhi Government General Hospital nung ketdangsertemi ashiba agi, Bodhbar nikongdang 1:55 ako meta pa alima nungi pila.

Pa temang kanga mejungi akümba sülen February 1 nungi Intensive Care Unit (ICU) nung yur treatment agüja liasü. Pa multidisciplinary team kati tajungtiba nung anepalua

yariogo, ajisüaka temang shilem aikati mapa meinyaki asü.

Tamil Nadu Angh, R N Ravi-i sangdong ka ajanga, "Nallakannu-i pa akumli piyong nüburtem tajungtiba nung tenzükogo. Pa asüba ajanga tapok tulu patsüogo. Ni par kibong aser pa pusemertem den mangyim jashi lemsateper," ta metetdaksü.

Chief Minister Stalin-i, "Nallakannu ya linük nüchiso atema rarar ka liasü. Loktiliba nung temelenshi adoktsü atema Communist aser Dravidian tangatetba na külemi aotsü nüngdak, ta pai jembia liasü," ta metetdaksü.

Stalin-i, "Dravidian model sorkar tenüng nung pa nem 'Thagaisal Thamizhar' (Distinguished Tamil) Award agütsütsü maongka angu. Nallakannu-i nübur atema ali

aser ibaji nüburtem melungjang nung teti alitsü," ta metetdaksü.

Chief minister-isa, "Ni par kibong züngsemtem, kinüngertem aser Communist züngsemtem den mangyim jashi lemsateper. Asenoki akhüm agüja asen lenir den tatem salem lemsateper aser tetushi agütsüdi," ta metetdaksü.

AIADMK general secretary Edappadi K Palaniswami-i, Nallakannu ya pei atema masü saka pi atema aliba lenir ka liasü, ta metetdaksü.

Nallakannu ya 1925 küm December 26 nü Tuticorin district kübok Srivaikuntam nung aso. Pa tebu, Ramasamy ya aluyimer ka liasü. Tanur ter rongnung pa ya tasembuba liasü.

Pai jala ana den semchir aika toktsür pilaogo. Pa kinüngtsü Ranjitham arrshi küm 82 lia 2016 küm Chennai nung asü.

Kasa maongka angu nung ang 'Terenlok India' ta ajatsü: Murmu

Nagpur, February 25 (Agencies): Terenlok alitsü atema ajaki kasa maongka angu nung ang atangji 'Terenlok India' ta jatetsü, ta Bodhbarnü linük Tir Droupadi Murmu-i ashi.

Bodhbarnü Nagpur yimti nung 'Golden Era of Maharashtra through Unity & Trust' campaign tenzüksüba sentong nung jembidang lai,

"Asenoki tamajung tebilemba indoktsüla aser tajung tebilemba agizüksüla," ta ashi.

Laisa, Chhatrapati Shivaji Maharaj ya ajungmesoba lenir ka liasü; pai ochi temeden aser nüchiso atema raraan liasü, ta ashi.

Iba campaign ya Maharashtra state tesem ajaklen tamang katetba,

tesünep, yimjung, telongjem aser akhümtsübutep ajungkettsütsü nükjidong nung ayongzükba lir.

The Brahma Kumaris-i ayongzükba sentong nungji Maharashtra Angh Acharya Devvrat, state revenue minister Chandrashekar Bawankule aser Brahma Kumaris nung tongti ketdangsertem aika dena liasü.



February 25, 2026 nü Dehradun nung Congress lenir, Harish Rawat leniba nung opposition INDIA teloktep nungi lenirtemi Uttarakhnad state sorkar 'Forest eviction policy' anema longkak aiter noksa nung angur.

Omar-i Kashmiri kaketshirtem dang Iran toktsür arutsü mepishir

Srinagar, February 25 (Agencies): National Conference lenir aser Jammu & Kashmir Chief Minister, Omar Abdullah-i Iran nung aliba Kashmiri nunger kaketshirtem dang tekeraba nung iba linükji toktsür arung, ta mepishio.

Osangbenertem den jembidang Omar-i, "Ni iba ya jangjajangja ashir, India sorkari tekümdangtsü metetdaksübaji parnoki sendoka meyütsütsüla. Ajimesüra asüngbo ibaji ajanga tebilemtsü bener arutsütsü," ta metetdaksü.

Paisa, tang Iran nung tensa tera junga aliba mapang aser airport lapoka aliba mapang nung kaketshirtemi iba linükji toktsür arutsüla, ta ashi.

"Parnoki ticket mekazükba sülen meyipa arutsüla. Tensa

meraksara parnoki tanaben meyipa aotsü akok. Kuli kecha makaibo Ministry of External Affairs-i tekümdangtsü osangji magütsütsü. Tesülen Iran nung tensa raksara parnok anir arutsü atema kanga tasak asütsü," ta chief minister-isa metetdaksü.

National Conference Tir, Dr Farooq Abdullah-ia kaketshirtem dang tekeraba nung Iran toktsür arung ta mepishir.

Omar tebu Farooq-i, "Asüng tayimtsü senzüba anenra tsüraburtem shisabulutsü aser yangi petsaperong adoktsü.

Tekeraba nung arubasa tajungba, kechiyong tayimtsü senzübaji anenra parnok anir arutsü atema kanga tasak asütsü. Sorkari tekümdangtsü metetdaksüogo, anungji ibaji süoki ia agitsüla," ta ashi.

PM Modi-i Israel semdang; Israel PM Netanyahu-i pa agizük



New Delhi, February 25, 2026: Bodhbarnü Ato kilonser Narendra Modi tayimtsü ajanga Israel-i apusoa aotsü lia tangokba noksa nung angur.

New Delhi, Tsüklai/February 25 (Agencies): Bodhbarnü Ato kilonser Narendra Modi Israel tonga ogo; Tel Aviv nung tayimtsü anendak Israel Ato kilonser, Benjamin Netanyahu-i pa agizüka liasü.

2017 küm mezüng Modi-i Israel semdanga liasü aser tang agi tanabenbuba pai Israel semdang.

Ato kilonser Modi-i Israel Parliament 'Knesset' nunga jembitsü.

Israel-i apusoa maodang Modi-i, pai Israel Ato kilonser, Benjamin Netanyahu ajurua linük ana tsüngda lenla balala nung amalitepa inyakba jenjang tashi itshitsü aser regional den International onüktem nung o lemteptsü yongyar, ta metetdakja liasü.

2017 küm mezüng pai Israel semdangba ajanga linük ana

tsüngda defence, aluyimba aser water management sectors nung maongka aika lapoka liasü.

Modi-i Israel nung aliba India nungertem den-a jembitsü. Pai Netanyahu den senden amenba sülen technology, security, artificial intelligence, aluyimba, water management aser shishilembaba dak sendakba tezüngzüktep aika agitsü imlar.

Bodhbarnü Ato kilonser Modi agizüksü atema Tel Aviv yimti lenmangtem nung India nungertema aika adenshia liasü.

Osangbenertem den jembidang Israel nunger kati, "Ni Know India tetoktepba nung shilem agia liasü. Yihuda nunger aika India tesem balala nung lidar. Israel aser India na tsüngda tezüngzüktep aika agitetsüsa jenjang ka nung lir," ta metetdaksü.

- ALI AYOKER -

- * Prime land for Urgent Sale !
- * 70,000 sq. ft.
- * Naga united village
- * Plain stable high land
- With concrete boundary walls and natural drainage.
- * Near the main road
- * Any plot size available
- @ 430/- sq. ft (Negotiable & No broker)
- Contact : 7628822085 / 9366156425



TIR YIMYIM YIMOBILEM (EDITRIAL)

DIMAPUR THURSDAY, FEBRUARY (TSÜKLAI) 26, 2026

Saru mesaru maremertem

Nagaland nung state government-i Municipal Act latetba maparen nung nübortemi magizüktettsüsa inyakyim kar aliba ajanga mapang talangka Nagaland nung Municipal aser Town council election magiteti aru, anungji tenüngbo Municipal saka Municipal aser town-tem mali government nung ketdangsertemi dang Municipal Act nung aliba tashi bener mapatem inyaka aru. Iba mapang nübortemi municipal aser town council election agir pei nisungi Municipal aser Town council mapatem reprang nungbo koda jungla ta bilema liasü. Kasaji, government nung alirtemia bilem, anungji Municipal Act nung nübortemi magizüktettsüsa aliba arlatem endoker, nübortemi mulungba nung latetshir Nagaland ajaklen Urban Local Bodies election agiogo. Nagaland asünungji, Municipal aser Town council election nunga nisung aika senotsüa aika endoker alitsü aser tesem aika nung nübortem rongnunga tamajung kanga agiteper alitsü. Ajisüaka, tang Municipal aser Town council-tem inyaksangshi nung ya imlaba ama masü, terenlok mapatem inyakba angur masü saka saru saruba dang angur aser angashir. Aji oda, ULB election agiba to Municipal aser Town council tenteter saru saru tenzüksü asoshi agiba amato dang bilemtsüsa, Municipal aser Town Council purtemi saru saruba anema nübortemi ola adokba angashipet angashir. Atangji, Municipal aser Town council-i saru sarutsübaji tim dang saka mesarutsüla mapatem ajak nung sarura, town nung kiburi anir ozüng raksar asütsü. Aji oda, Municipal aser Town Council ya saru sarur telok ka ama masü saka pei town meima pei shisatsü, nübo aser rongsen agi terenlok mapa inyaksürtem telok aser nisungtem amato bilema nübortemi reprangtsüsa inyaksüsbaji parnok asoshi kanga tongtibang asütsü. Ajisüaka, tang Municipal Affairs department nungi Nagaland nung Municipal aser Town council ajak dangi ozüngi memelaba saru mesarutsü asoshi nenshia metetdaksüba osang jagi Municipal aser Town council nung züngsemtem tali tenüng menükogo aser nübortemibo Municipal aser Town council purtema ano 'faction' talila ka tentet amai dang bilemer. Atangji, ozüngi memelaba saru saruba ya tanübo telong nung alir telokbo mali ajak tema nung alir asünungji, tema nung alirtem telok balalai sarur aser item saru sarur teloktem rongnungji Nagaland government kübok aliba department-tem rongnunga karibo Nagaland tenük menükja Nagaland süngküm nung mena yur khu abenba garitem dang saru meshiba angur. Item jagi gate nung khu abenba garitem dang saru meshibaji item khutemji dokan nung ayokdang asenok talirtemi agütsür, anungji shitakba nungbo khu abenba garia makoksar aser dokan kiburtema makoksar saka asenok talirtem akoksar. Aji oda, telok kari alo seret shia nung sen kaka aser bengana seret nung sen kaka sarua agira, item sen kakaji asenoki dokan nung alidang tayokertemi asenok dang nungi agidagi ta asenoki bilemdi, kechiyong tayokertemibo kodanga takoksa nungbo mayoktsü. Iba dang nungi tamajungtiba kaji, Municipal aser Town council alidak saru tapu balala sarutsü saka yimti yimdonga junga maok, tesempatsüka aser tzünglu aru majung motzü taodak maka, aonung street light mali, kodaanga tangar bendanger asen limai anir maruka, asen yimtimi alilenang tesempatsü taketba aser azüklenang tebenjaba ta asenok yimti dang kodangang Municipal aser Town Council area ta majatsüsa ka aliba ya asütsü. Iba tensa tia ya melenshitsü asoshi asenok sen menüngdaker saka asen tangatetba shisatsü aser tokolok melenshitsü nüngdaker. Tang asenoki bilemba amato, asenoki asenok ya saru sarua taküm alirtem amai dangsa bilemra, Delhi nung jagi sense crore lakh junga yokyonga asenoki asen yimti yimdonga mouktettsü. Alima nung nübortem asoshi tajung inyakba ya sen kija agi inyaker masü saka pei lima aser nübortem meimba shisatsü agi inyaker, kechiyong temeim tashiji sen tashi dang tuluba. Aji kodang angatetdir, kwi sarutsü ta bilema aliba to kwi tenlatsü ta asüba tangatetba aser mapa agi melentsü.

OLEMSABANG

AIATAI

~ M.Meren, Ex. Pastor Ungma.

Kodang Aiatai ta südir iba dak alaka tansütsü tia aikabo mali, aser ajuruyonga aikatibo iba Aiatai tiaji majurur, asenoki iba ya yimya o amaka oda tia tamajung ajak nung aiataiji amshir saka ibai atamata tekangshi aser timtem tatembangbaji iba aiatai ya lir. Laishiba nung Babilon tulu laoba atema asemben tashi Aiataiji shia lir, kechiaser Babilon yimlaji alima nung atamata kadangbo masü merena ali, aser iba tamaren jagi alar tiai aiba angutsü aser aji pa merena alidang pa kanga mezümekuma ali, meketa aliba kintem tesüngmangtsü rishikangshia samaja kangshia aru anungji kodang Babilon ta teshia angashidir meketa aliba kintemi asükjang meronga atentena ali, saka kodang Babilon Aiatai tiai ai, kodanga ali-i malutsü ama anüng petinutem mesüka alimai repranga aliba tangbo Aiatai tiai aitsü mapang ajuru anungji kintemi teka ajak malokja ashi, tsüa Babilon tamaren sentsüwangshi tulu to iba aiatai tiai aitsü mapanga ajurur no ta teku tsünga pelatep. Iba tiaji Tsüngrem jashidaksüba ajanga adokba AIATAI tiaji ajuru.

AIATAI tia ya Yihuda kini aiben ajurua lir, kechiaser Tsüngremi par kinji asa Pa kin asoshi shimtet aser talak nung amai metemshia alima kin ajak madak nungtugusa amshi aser pa akoker kata mali pa sünütsü süa ngaja-ngalema ali, saka pai Tsüngremi ashi manga aiben Tsüngrem jashidaksüba ajanga Tsüngremi aiben merenoka merenshi mesaktettsüsa merenba, aka masutettsüsa merenba, ajioda Yihuda kinji yamaji merenshia aru, iba yongji Yihuda nungeri AIATAI ji aiben ajuru aser aiatai kena mejema aten.

Tanü lima tia nung Kanan lima ama Naga lima nung kecha nunga maka saka ajak dang temoatsü tulutiba yashia nangshia akaba limaji Dimapur lima ya asütsü saka memenue AIATAI lima akümtsü menua mali, akidang tsürabur otsü nung Lijabai alima yangludang tzüma lima tashi kanga junga lenden lima timba menoka yanglua aru, saka kodang Naga lima yanglutsü watangbang ajuru idangji Tzüleplu kati ooo arür arudageni ta Arür lendong osang sangoktsü, anungji Lijabai asen Naga limabo mashi-mashi, longkerak agi sünga, tekong tenem agi sünga yanglu ta ashir anungji Naga lima kecha nung lenden lima maka atang temeja, tashi temeteteremi tzülu yimang ta ashir saka Naga lima nung tzüluyimdak kecha nung maka, tekong tenem agi sünga tang lir, aser tekong tenem agi sünga alinungji tzü agia kanga anünger ta yamaji lir, saka Dimapur lima ya tzüma lima den kidanger aser Lijabai alima yangludang tzüma lima tashi yanglua arudang Dimapur lima yaa tera tensema yanglu südi ibajagi Dimapur lima ya Naga lima memesük lenden lima lir, idagi majungtsü kecha maka oda Naga lima nung Kanan limaji Dimapur lima ya asütsü.

1970 tashi nung Dimapur lima ya arem temeja ajak agi Train station tang tilaka liasü, Kermohol tesem ya Azü ayokdak tesem ka dang liasü, tangbo city Tower anung tashi mesoa yanglua lir, saka Yashi tashi arem tang liasü saka tanübo tenük agia mereprangmen city olua kumaago, Arogoa Aor Arogoa tila katang liasü saka tanübo Aor Arogoa onsara kumaago. Ao lima nung tashir tawar kwika adoker ajakji teinyakdak tenzüker süaka Retd. Süaka ajak Dimapur nung nungtener, Tsüngremer wadang nung Retd. Pastor süaka, Missionarytem süaka ajak Dimapur nung nungtener, shishilembar tulu tila ajak Dimapur nung nungtener, anungji Ao lima yimtsüng aika yimtok ama kuma odage, yimtsüng nung tashir alibaji ajak agi Primary tesayur asem pezüka dak alaka mali, lenmang makaji yimer tulur takartemji pei yimtsüngi ken tanga motanger, akidangbo kilen noklang pungu terok aliba agi kilen noklang ana asem tang aser ajia tambur-tantsür temeja ta yamaji yimtsüng tiaji ajioda temeimtsü tia kema odakge. Saka ajak dang temeimtsü AIATAI tiai aitsüba wadangbang nung alibaji Dimapur lima asütsü. Kechiyong anogo shia tesem tesem nung nisung tasü mang merepdaka akabaji Diumapur nung ataloker, anogo shia nisung pur aoba ataloker, anogo aser mapang ajak nung kechi nisungar memetet prangpong bener saror onsara, Kinungboi kinungtsü tepsetba onsara ataloke, kinungtsüi kinungbo tepsetba ataloker, tawabo nisung kati par kinunger nisung asem tashi nok agi lepsetba atalok, awatsüng nung arakseta asüba onsara ataloker, anogo shia aüuyar apuba agi sünga lir, Naga nüjiso pushir teloka anogo shia ama telok telok renloker aser ajakji Dimapur nungsa timba nungtena alir. Ano memetetba tatalokba zünger mezüngma ataloker.

1939-1944 tashi Japan war adoka aji temer kelen alima ajak nung kechisarina agi anünga aküm, idangji Dimapur station tila ka nung nisung kati Ngashi ishika alizüka bener arua aji lenjang nung sü ka lemdaker Ngashiji idakji tokzüka yutsü aser pa metemer ka dang nai ken mener ya yokjang aser taonung ni ne nem taa agütsütsü ta shir yokdaksü tenzük, idangji pa den metetteper tembar ka arule paia taonung luin yanglutsü ka agitetdi ta ser ka bener ole, ano yamaji pa metetteper ka arule pai yamaji ka agiteta bener ole ta asüdang Ngashiji ajak arema bener oma, anungji pai bilem ajak bener omaba ya kü dak atongtsü anungji tanüngba ishika ya ni ajak bener oadokdi ta ser süji loktena bener ao, kibur arudang Ngashijia maka, tayoksanga mali ta ajuruba shidakba atalokba otsü ka lir.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Africa nungi missionary tem alima tesem balalai yoktsü bangjem



February 16, 2026 nü South Africa yimtiba, Johannesburg nung International Mission Board-i ayongzükba "Together: Africa to the Nations" conference nung adenertem sarasadem dang tangokba noksa nung angur. Iba conference nung Africa nung aliba linük 33 nungi Arogo aser mission lenir 100 dak tema aden.

February 26, 2026: Taoba hopta Africa tesem balala nungi Khristan lenirtem South Africa yimtiba, Johannesburg nung adenshia senden amendang parnoki alima tesem balala nung mission mapa inyaksü aser missionary tem jenti yoktsü bangjemogo.

Iba conference ya February 16 nü ayongzükba agi aser iba sentong nungji Africa nung aliba linük 33 nungi lenir 100 dak tema shilem agi.

Africa nung dang masü saka alima tesem balala nung Khrista osangtajung proktsü atema Africa nung tamangertem ayongmesotsü nükjiong nung iba sentong agi.

International Mission Board-i ayongzükba "Together: Africa to the Nations" conference ayongzükba nükjiongji Africa ya mission field ka dang masü saka mission mapa inyaksü atema alima tesem aotsü atema liasü.

Akhidangbo Africa ya mission field ka dang liasü saka tangbo parnoki alima tesem balalai missionary tem yoker aser mission wadang tulu inyaker.

Küm aika Khristan missions ya anüolen aliba organizations-i inyaka alima tesem balalai missionary tem yoka liasü.

Taoba hopta agiba conference nung tongti jembirtemi, tesüiba küm ishika tsüngda African Arogotem kanga inogo, aser alima tesem balala nung tongti shilem agitsüsa renema dang lir, ta metetdakja liasü.

Iba senden nungsa Africa nung pastor tem aser mission lenirtem dak rangloker tebilemba onük balala nung o lemtepa liasü.

Iba senden nung jembidang International Mission Board nung Global Relations Senior Ambassador for US, Jeff

Gunn-i, "Khrista ya meimchir ajak asoshi lir. Pa ya alima rangben meyong. Asenoki ibaji atangji ta meteta lir aser agizüker, ajisüaka tan hopta asenok longjemba ya tanabuba ochi o ka atema adenshiba lir," ta ashi.

Paisa, "Kibubai tenyaba wadang tulutiba ya kin ajak atema lir. Iba tetezü, Khrista osangtajung proktsüji teshimtet kar atema dang maongka mesüra teinyaksü mapa ka masü. Iba maongka aser khuretji Africa nung tamangertem, Asia nung tamangertem aser Latin America nung tamangertem ajak atema lir. Tongmelang agi, Khrista osangtajung alima tesem ajaklen prokshitsüji Arogo ajak teinyaksü mapa lir," ta metetdaksü.

Conference mapang nungsa workshops aser plenary sessions agia liasü, aser item sentong nung Lai tesayuba, Arogo nung lenirtemi ajangshiba aser mission wadang nung tajangshibatem lemsatepa liasü.

Conference nung o jembirtemi Africa nung Arogo kanga ainba aser tamangertem kanga renlokba indang jembir.

Shisashirtem aser Arogo nung lenirtemi, tang alima nung Khristan nütsüng tekeratiba ainba tesemji sub-Saharan Africa lir, ta metetdaksü.

Africa ya teyari meshirtem aser bendanger missionary temi tenzükba tesem ka liasü, ajisüaka iba conference nung adener lenirtemi, alima tesem balala nung mission wadang inyaksü atema Africa nung tamangertem temsüa lir, ta parnoki bangjem.

Iba conference nung kanga tongtibangsüa jembibaji 'amalitep' liasü. Shilem agirtemi Africa continent tesem ajaklen Arogotem aser mission organizations longjem

amalitepa tenzükertem maitsü jangjatsü, training agütsütsü, nungita yaritsü aser alima tesem balalai missionary tem yoktsü atema ayongzük.

Iba conference nungsa Africa nung Arogo puti otsü meyipa reprangshi. Africa nung lenirtemi mezüngbuba Aso nungi Aso terbuba tashi nung Khristan yimsü tenzük dang Africa-ia tongtibang shilem agiba indang metetdaksü.

Lenirtemisa Khristan nütsüng ajema aliba tesemtemi Africa nung missionary tem yoktsü atema jembir. Tang Africa nung tamangertem aika Europe, Middle East aser Asia nung mapa inyaka lidar.

Mission wadang tulu inyaksü atema African Arogo renema dang lir, ta bangjema iba senden tembang. Parnokisa mangdang ayubaji mapa kuma inyaksü bangjem.

Parnoki amaliteptsü, yariteptsü, Arogo aser mission agencies tsüngda longjemer inyaksü aser Africa nung missionary aika adokdaksütsü atema inyaksü bangjem.

Iba conference ayongzükertemi, iba conference ya tang tatembang masü saka maneni o lemteptsü aser peipei linük nung mapatong balala benoka inyaksü, ta metetdaksü.

Mapang ka nungbo alima nung Khristan lima tiyongtsüji Europe aser North America lir ta züngshia liasü, ajisüaka tangbo tiyongtsüji sub-Saharan Africa kumogo. Tang Africa nung Khristan nütsüng million 697 lir.

Europe nung Khristan nütsüng million 505 dang kumogo aser North America nunga Khristan nütsüng million 238 dang kumogo. Africa nungbo tang Khristan nütsüng million 697 lir.

ANOGO ABEN TSÜNGREM DEN

Nisung Yimya

Lipok 1:24-31

Atangji alima nung aliba shiruru dang nungi meimchirji balaka asü ? Shiruru lima nung meimchir indang shisadangtsübaji kuli aika lir. Tanga shiruru ama pa asor, tangu sashir, achir, mejanger aser asür.

Kechi nung balaka ? Khristan theologyji nisungji Tsüngrem mesüka yanglu ta ashir (Lipok 1:27). Shiruru yamaji masü. Teyangluba nung nisungji balaka yanglu ta sangdongbaji asenoki metettsü tenügdaksü. Pa Tsüngrem dang nungi teküpbokba kechiaser pa Tsüngremi yanglu, pa shiruru dang nungi temaba kechiaser pa Tsüngrem mesükba nung yanglu.

Atangji asenok tetsübuttsü ka aser tesümgangtsü ka yanglu (T.Ken 139:14). Itemi shisadangang: Laishibai ashir, asenok shiruru dang nungi temaba. Süra kechiba aikati akhüm dang nungi teküpbokba nung shiruru jakla ama alir aser inyaker ? Meimchir libaliro ajak nung asenoki shibai asenok Pa mesükba nung yanglu, Pa ama alitsü merangtsüla.

Sarasadem : Ne tashikang akhüm kübok ni miimang : tenükjang ama ni kümzükang.

T.Ken 17:9.

Tenangzükba: Kechiyong shibai nenok dak kongshir Pai pei nükjang nung kongshir.

Mexico nung Tenla ki 100 dak tali shibangdaksüsang tepsetogo



El Mencho (tiyong)

February 25, 2026: Mexico nung temesepba mozü balala ayokba organization- Jalisco New Generation Cartel (JNGC) nung tongti, Rubén Nemezio Oseguera Cervantes sepaitemi tepsetogo.

Pai mapang shia Arogo nung lenirtem amokmerena liasü aser pai Tenla ki-a 100 dak tema shibangdakja liasü.

February 22, 2026 nü Jalisco state kübok Tapalpa nung Mexico sepaitemi Rubén Nemesio Oseguera Cervantes "El Mencho" yirutsüba sülen medical teyari agütsütsü atema anir aoba mapang nung asü.

Sepaitemisa state tenet nung iba telok nungjagi züngsem 30 tepset aser 70 shi apu. JNGC züngsemtem den raradang sepaitema 25 asü.

JNGC ya linük 40 nung yakyaka inyaker aser parnoki ozüng alema cocaine aser fentanyl shibelener. Mexico nung ozüng alema inyakba telok tamajungtibaji JNGC lir.

JNGC-i evangelical pastor nung temesepba mozü balala tem danga 'nenok nem tekümzükba agütsütsü' ta shia saru meshir aser magütsüra amokmerener.

Arogo tasen tenzükba atema-a JNGC-i amokmerena saru meshir. Ajisüaka tetsübu nung pastor tem aikati item ama osangji miimshir.

Arogo tasen tenzükba pastor tem dang JNGC-i phone ajanga, "Tongti lenir tenüng nung ni jembir. Na kong aliarar onoki meteta dang lir, Tenla ki address meteta lir, ner kibongi kechi inyakerar meteta lir. Anungji pastor, nai tagütsütsü aliba tim sentsüh agütsütsüla mesüra nai tia tamajung ajurutsü," ta amokmerena liasü.

2024 küm kija nunga Chiapas state nung evangelical Tenla ki 100 dak tali shibangdakja liasü. Iba telok jagi pastor tem aser Arogo nung züngsemtem amokmerenba ajanga Arogo aikati Tenla ki shibangtsüsa aküm.

AO OSHI ANGAZÜKDAK:

TANÜ ANGAZÜKTSÜBA OJANG



Tzütok

(n) tzüta nung mochiedong mesüker meiba dong (reed)

* Ayong tzüküm nung tzütok kanga junga meyrir.

Tzütsüng

(n) Tzü atsünga aliba tesem (swamp, marshland)

* Tzütsüng nembanger ki asüba nung junga malir.

OLONG PAITEP # 7426

Grid for OLONG PAITEP # 7426 with numbers 1-16 in various cells.

TIPIEN

- 2. Auonung chiyongtsü asenba
5. Mangyimba mapang
7. O tamendakdak
8. Peidak malangba
10. Juli
12. Sen ayudak
14. Tenük agi ajitet
15. Tamajung aküm
16. Apuso

LANGTSÜNGLEN

- 1. Lenmang
2. Aor kidong ka tenüing
3. Tenarong maten
4. A ___ g
6. Mopung apodoka
9. Tongtipang tagitsü
10. Menungra bilem
11. Aiür
13. S ___ k
14. T ___ r

OLONG PAITEP # 7425 TELANGZÜBA

TIPIEN :

- 1. Yiar, 3. Tesola, 7. Yimra,
8. Tangar, 9. Peria, 10. Tanur,
11. Tasen, 13. Lemjem, 15. Tambu,
16. Khuret, 17. Sang.

LANGTSÜNGLEN :

- 1. Yimti, 2. Amen, 4. Shiner,
5. Alaka, 6. Satan, 9. Putet,
10. Tembar, 11. Tatok, 12. Amang,
14. Jala.

NAI-A YA METETTER



United States nungi asangur Eric Klabei "world's tallest toothpick sculpture" yangluteta lir. Eric ya Naperville, Illinois nung alir aser pai ita aika agia toothpicks aser glue dang amshia feel 17 talang Eiffel tower mesüka yangluteta liasü.

Manipur Governor-i asür MLA Valte'er ki semdang



Imphal, February 25, 2026 (Agencies): Manipur Governor Ajay Kumar Bhalla-i Churachandpur district nung asür MLA Vungzagin Valte'er ki semdanga asür nem tetushi agütsüogo.

Governor Bhalla-i tasü mang nung naro ka yutsü aser sü ka abenloksü. Paise asüri toktsür aoba kinungertem den ajurutepa sensaksem aser asükhu lemsatop.

Iba mapang Security Advisor

Kuldiep Singh-ia asür MLA Valte nem tetushi agüja liasü.

Valte asüba ajanga Manipur nung lisopurtem temulung raksar aser jashiteper. May 2023 nung mepetmesü adokdang pa dak kanga mejungi azük aser küm asem jungnüa timtema arur pa asü.

Arishi küm 61 tain Zomi nunger MLA Valte ya Churachandpur district kübok Thanlon constituency nungi liasü.

Pa ya Bharatiya Janata Party (BJP) MLA liasü aser temang mejungi akümba sülen tayimtsü ajanga National Capital Region nung anepalutsü atema anir ao.

May 2023 nung Valte-i taoba Chief Minister N. Biren Singh den ajurutepba sülen meypa aodang nisung telok kati pa amak.

Manipur sorkari asür Valte nem tetushi agüja anogo asemnü mangyimtsü metetdaksü.

Mawiong PHC nung doctor aliba maliba bushisüingdanger

Shillong, February 25, 2026 (Agencies): Shillong MP Ricky Andrew J. Syngkon asüba sülen Meghalaya sorkari Mawiong Primary Health Centre (PHC) nung medical staff alima maliba bushisüingdangtsü tenzükogo.

Mawiong nung futsal match nung arishi küm 54 tain MP Syngkon laoba sülen pa PHC-i anir aodang doctor ka liasü asü maliasü ta health department-i bushisüingdang südar ta Chief Minister Conrad K. Sangma-i metetdaksü.

"Iba mapang PHC nung doctor aliba maliba bushitepdar aser iba osang nung ajemdaker health department-i nüngdakba meratem agitsü" ta Conrad-i ashi.

Meghalaya nungi Lok Sabha MP ana rongnung Syngkon ya ka liasü aser February 19, 2026 nikongdang pa temulungjang mapa meinyaki akümba sülen asü.

Pa football tasayadak nung ali nung lao aser mezüing Mawiong PHC-i anir aser iba

sülen Shillong nung missionary hospital kati belen saka doctor temi pa taküm meküzmüktet.

Syngkon ya Voice of the People Party züingsem ka liasü aser 2024 Lok Sabha elections nung Congress lennir Vincent H. Pala madak takok ngua liasü.

Syngkon-i politics nung majemokdang North-Eastern Hill University nung Economics Assistant Professor inyaka liasü. Pai 2024 general elections nung tokteptsü atema iba mapa toktsü.

Arunachal CM-i 50 buba Nyokum Yullo jubilee nung aden



Itanagar, February 25, 2026 (Agencies): Arunachal Pradesh Chief Minister Pema Khandu-i Nyokum Yullo pur Golden Jubilee benjungmung nung denogo. Iba benjung ya Bameng constituency nung ayongzüka amung.

"Iba tongtipang benjung nung yimjung, azükaru aser telongjem atema Nyokum Ane dang sarasademogo. Iba benjung ya

sobaliba maitsü ka lir aser Nyokum ya benjung ka dang masü saka nisungtem aser alima tsüingda tesentaktep takang lir" ta Chief Minister Khandu-i ashi.

"Sorkari Bameng constituency atema Rs 67 crore alang mapatongtem bentsür aruogo. Iba Golden Jubilee ya tetenzük tasen ka südakjang aser asenok ajak longjemer

Bameng tashitaitba kümdaktsüdi" ta paise ayongzüka.

Külen, külemküja aser wako atsüketa 57 buba Doimukh Nyokum Yullo benjungmung tenzük liasü.

Nyokum Yullo Ground nung celebration committee-i Priest Tana Rohesor pelashishia agizük aser Rono Ground nung wako atsüket.

GOVERNMENT OF NAGALAND
DIRECTORATE OF SCHOOL EDUCATION
 NAGALAND: KOHIMA
NOTIFICATION

Dated Kohima, the 24th February 2026

NO. ED/PLN/E-19/2022-23 :: All concerned are hereby informed that the application forms for provisional recognition, renewal of provisional recognition and up-gradation of permitted Private Schools (Primary and Upper Primary) and forms for provisional recognition and renewal of provisional recognition of permitted Pre-Schools have been uploaded on the Department's Website <https://education.nagaland.gov.in>. The forms shall be available from the date of issue of this notification till 31st March 2026.

Therefore, the concerned may download the required form/ forms and submit the same to the Department within the stipulated time.

(SHASHANK PRATAP SINGH) IAS
PRINCIPAL DIRECTOR

Brazil tüzümsüng aser anentsüh lendong nung nisung 30 asü



Brasília, Tsüklai/February 25 (Agencies): Southeastern Brazil nung tzünglu kanga sashia aruba sülen anentsü alua kitem anener aoba sülen nisung 30 süogo aser nisung 39 samar bushidar.

Minas Gerais state nung aonung sangwa tzünglu aruba sülen ayong ka moshia ayimba ajanga yimtung ajak tzü agi mobanga liasü. Iba tesem nung taoba mapang dang nungi iba ita tzünglu tesashitiba aruba mangaoka lir.

State firefighter temi Mongolbarnü ashiba agi, Juiz de Fora & Uba yimtsü nung nisung 30 asü aser nisung 200 dak tema kümzükogo.

Firefighter aser azütemi ali anen nung nembanga aliba

nisung 39 agitettsü atema inyakdar.

Juiz de Fora kübok tenem nung aliba kiyong ka nung anentsüh tulu ka alua ki 12 anener ao, ta fire brigade nungi Major Demetrius Goulart-i AFP dang ashi. "Tzünglu aruba mapang nisung aika ki telung nung liasü," ta pai ashi.

Juiz de Fora indang mayor, Margarida Salomao-i state of emergency ka benokogo.

Salomao-i ashiba agi, la indang municipality kong nisung million tesadang ka lir, iba tesem nung February ita tzünglu timtiba aruogo.

Nisung 3,000 shi pei ki toktsür ogo, ta mayor office sangdong ka ajanga metetdaksü.

Anentsü tesem 20 tashi nung aluba sülen mepu karbo tonga moteti kümogo, ta Salomao-i ashiba den tensa kanga mejungi lir ta shisem.

State ketdangsürtemi municipal school ajak nung class tem thitsüogo.

Brazil nung kümtem tsüngda tüzümsüng nungi tenzüker tsüngsarusa aser mopung tatsük aonba amala tsüngsang mongpu tamajung agi timtema arudar.

2024 küm southern Brazil nung tüzümsüng lendong nung nisung 200 dak tema asü. Küm ana tejakdang Petropolis yimti metzüngba sülen nisung 241 asü. Mongintemi ashiba agi, tüzümpung melenshiba ajanga item lendongtem ya tali atalokyonga aoer.

Venezuela nung nisung 3,200 dak tema chiokogo

Caracas, Tsüklai/February 25 (Agencies): Venezuela National Assembly indang special commission kati sangdong ka ajanga, linük nung taoba hopta nungi amnesty ozüng tasenba benokba sülen nisung 3,200 dak tema chiokogo.

Tepuokdak nungi chiokertem rongnung taoba mapang tepuokdak yua alirtem, house arrest nung tokja alirtem aser temzüng ozüng balala agi alena alirtem densema lir.

Commission indang tekolakba, ozüng yanglur Jorge Arreaza-i osangbenertem den sensaksema mapang ashiba agi, February 20 nü ozüng tasen agizükba sülen pai amnesty atema application ajak

senteper 4,230 agizüka liasü.

Arreaza-i ashiba agi, application tem asadangba sülen house arrest aser tanga tenokdangba balala agütsür alir parnok 3,052 nem nüjiso agütsüogo aser iba den tepuokdak nungia nisung 179 chiokogo.

Taoba hopta Venezuela indang interim tir Delcy Rodriguez-i amnesty legislation ya ozüng kümdaktsüsü atema sign asü, koba National Assembly-i agizüker liasü. Yimden yimsüsüba tsütsü mangatettep aliba, longjemshitsü aser yimden yimsüsüba dak sendakba nung tepuokdak yua alirtem chioktsü nükjidong nung iba ozüng ya yanglua liasü.

Iba ozüng nung sign asüba mapang Rodriguez-i ashiba agi, iba ozüng ajanga linük yimden yimsüsürtemi atsüanem akaba aser Venezuela nung yimden yimsüsüba tsütsü lenmang tasen lapoktsüba sayur.

Critics temi ashiba agi, Venezuela sovereignty anema bendangertem den longjemer inyakertembo iba ozüng küboki maittsü.

Maneni kiralongraba dak sendakba nung aija aliba security force tem iba ozüng küboki maittsü.

US-i taoba ita linük yimtiba maka taoba tir Maduro pur aoba sülen Rodriguez-i aniba sorkari tepuokdak yua alir aika chiokogo.

Ukraine aser US ketdangsürtem Geneva nung ajuruteptsü

Kyiv, Tsüklai/February 25 (Agencies): March ita tetenzüklen Russia den linük asem senden amentsü lia Ukraine nunger yimjung ken o jembiba nung tanishir Rustem Umerov-i Brehostibarnü Geneva nung US envoy Steve Witkoff ajurutsü ta Kyiv-i sangdongogo.

Bodhbarnü Ukraine Tir Volodymyr Zelenskyy-i osangbener den jembidang, American negotiators Witkoff aser Jared Kushner den ajurutepe senden amenba ya Russia den trilateral meeting atema renemshiba nung shilem ka lir, koba March ita tetenzüklen amentsü südi ta onoki amanger, ta ashi.

Umerov indang adviser-ia Brehostibarnü Geneva nung senden amenba mapang prisoner-of-war melenteptsü aser Ukraine yanglushitsü atema "prosperity package" indanga jembitsü ta ashi.

Taoba mapang Witkoff-ia yimjung tezüngzüktep yanglutsü asoshi sentong balala bushitsü nükjidong nung jembishinütsü ta shia liasü.

United States-i iba rara tatembang kati arudaktsüsü meranger, koba küm pongu buba nung lir aser nisung meyrirjang aika tepsetogo aser Ukraine anüdoklen aser south tsütsü tesem timba raksatsüogo.

Post-war settlement nung Kyiv aser Moscow ya litsü-lika tsütsü telemsa adoker lir. Russia-i Ukraine anüdoklen Donetsk region ajunga meshir aser Ukraine-i jembishinü akaba mapang memulungra tashiyim amshitsü ta tekumdangtsü shia lir. Ukraine-i iba akhangba magizüker aser Russia-i tarutsü nung amakba nungi kumzüka ayutsüsa security guarantees medeni tezüngzüktep kecha nunga meyongnem magütsüsü ta ashir.

Abu Dhabi aser Switzerland nunga taoba mapang ajurutepe jembishinü akaba nung terenlok kecha makai anenba sülen Geneva nung ajuruteptsü ya angazüker.

Kasa anogo iba yimti nungsa United States aser Iran tsüngta nuclear ken o jembishinü balaka alitsü imlar.

Myanmar anüolen tayimtsü amshia amak, nisung 17 asü

Sittwe, Tsüklai/February 25 (Agencies): Myanmar mitkari tayimtsü amshia Rakhine state nung amakdang nisung 17 tepset aser 14 yirutsü, ta yangji aliba osang ajanga ashir. Mitkari bhukumba party-i election nung takok ngur hopta ishika lir civil war nung nisung aika tepsetba tesüsabaji ya alitsü.

Mongulbarnü Ponnagyun township kübok Yoengu yimtsüng nung tayimtsü amshia amakdang asürtem rongnung tetsür aser tanurtem dena lir, ta Democratic Voice of Burma (DVB) ajanga ashi.

Iba yimtsüng ya Rakhine state yimtiba Sittwe northeast tsütsü mile 21 shi pilar lir. Iba yimtsüng ya Arakan Army-i March 2024 nung aokbanga liasü. Arakan Army ya ethnic Rakhine armed group lir aser Myanmar mitkar den rarar.

Arakan Army sangdong nung nisung 17 ya tai maket civilian tem lir aser prnok rongnung tanur asem dena lir ta ashi. Iba mapang nisung 15 yiru ta parnoki ashi.

2021 küm mitkari tashiyim amshia sorkar atsüngdokba sülen Myanmar nung yimtenren tsütsü mepetmesü adoka lir, aser democracy bhukumer tem ajembanga linük tesem ajunga nung sorkar anema nokdak.

Nisung meyrirjang aika

tepsetogo aser ano nisung million 3.6 shi pei ki yutsür tesem balala nung jenshia lir, ta United Nations-i ashir. Iba rara ya ajanga democracy actibists aser ethnic minority telok balalai nok-nü amer yimden yimsüsür anema nokdak.

Ponnagyun Youths Association mendenpuba Pyae Phyo Naing-i Mongulbarnü lendong atalokba ya kangasa majung aser ki pezü mesüra pongu rongdoktsü ta ashi.

"Nisung kar jeba liasü, aser tasü mang aika tesem balala nung prokshia liasü," ta arishi küm 23 tain Naing-i osangbener dang ashi.

"Nisung kar iba tesem nungi jena oa liasü, kechiaser onok tonga arudang ki kar rongka liasü."

Anüolen tüzükum anasa aliba Rakhine state dang taoba mapang Arakan ta aja, aser mepetmesü tamajungtiba atalokba region tem rongnung dena lir. Rakhine ajunga ama Arakan Army temi amokbanga lir, koba mitkar temi sapanger mapang shia tayimtsü amshia amaker.

Mitkar temi sapanger aliba nung raraba aser tawa international aid anenba ajanga iba state nung nüburtem yasa-tzüra agi kanga timtemtar, ta World Food Programme-i taoba küm tekumdangtsü shia liasü.

Asmita Kickboxing Zonal League nung Naga tsür anati shilem agitsü



Tabelen nungi tachichi tashi: Nukshikala Jamir (asayar), Khetoho Zhimomi (tir, NAKO), Mongsen Longkumer (Coach), Lemnon L.Konyak (asayar), Alemtemsu Longchar (General Secy, NAKO)

Dimapur, Tsüklai/February 25 (TYO): Nagaland Association Kickboxing Organization (NAKO) tenüng nung Naga tsür ana Khelo India Asmita Kickboxing Zonal League (EastZone) 2025-26 nung shilem agitsü.

Iba asayamung ya Siliguri, West Bengal nung February 26 nü tenzüksü aser March 1 nü tashi asayatsü

Nagaland Association Kickboxing Organization nungi asayatsü aliba asayar ana ya ka Mokochung nungi

Nukshikala Jamir aser ka Mon nungi Lemnon L. Konyak alitsü.

Tena ya NAKO Coach Mongsen Longkumer aser Alemtemsu Longchar, General Secretary (NAKO) nati meinerogo.

Iba asayamung nung Nagaland team state 11 nungi asayartem den tokteptsü. Iba asayamung atema ajak senteper senpet sen lakh 11.66 agütsüsü renema lir.

Tawa NAKO kübok Naga nung tebur team-i medal

pongu koka state nem konang tetushi bener arutsüogo. Naga nung asayartem yagi ajak senteper medal 5 angu, kong gold 1, silver 2 aser bronze medal ka anguba densema lir. Iba asayamung nung Nagaland team 4buba nung tembanga liasü.

NAKO ya 2000 küm tenzüik aser iba lokti tentet aser asayartemi national aser international asayamung balala nung shilem agiba mapang medal ngua state nem konang tetushi bener arutsüdar.

Afghanistan Cricket Board-i head coach tasen shimogo



Richard Pybus

Tsüklai/February 25, 2026 (Agencies): Afghanistan Cricket Board (ACB)-i Jonathan Trott melena national team head coach mapa abentsü atema Richard Pybus shimba sangdongogo.

T20 World Cup nung team-i junga masayatetba sülen Jonathan-i coach mapa tokja liasü. Pybus ya format ajak indang head caoch asütsü.

Afghanistan team March 13 nü nungi tenzüka Sri Lanka den UAE nung white-ball

asayamung ka asayatsü lia Pybus team nung adentsü. Pybus ya 1999 ODI World Cup nung Pakistan team final tonga asayaba mapang Pakistan tebur team coaching setup nung densema liasü. Pa mapang tatsüka atema Bangladesh indang head coach mapa dena inyakogo.

Pa ya 2016 küm Windies Cricket indang Director of Cricket mapa abentsü shim, iba mapang West Indies-i ICC tebur aser tetsür T20 World

Cup aser U19 tebur Cricket World Cup dena koka liasü.

Pybus ya West Indian cricket nung mapang talangka inyaka aruogo. Pa 2018 küm high-performance director asütsü shim aser iba sülen interim head coach asütsü shima liasü. Pa director of cricket asüba mapang fotmat ajak nung international asaya atema shimtsü asoshi asayartem West Indies' domestic asayamungtem nung shilem agitsü mandatory kümdaktsü. Iba ya asayar tejentemi linük balala nung T20 asayamungtem asaya senzütsü atema-ang shimba ajanga benoka liasü.

Pybus ya yiruba ajanga mapang talangkabo masayatet aser 1986 küm Suffolk atema List A asaya ka dang asaya, saka pa coaching dak sendakba nung tajangshiba aika bener aliba ajanga Trott melen shimogo.

Afghanistan Cricket team ya Sri Lanka den March 13 aser 25 tsüngda T20I asem aser ODI asem asayatsü lir.

Sen aser Sindhu nati anir India nungertem All England Open asayatsü

Tsüklai/February 25, 2026

(Agencies): India nung asayar Lakshya Sen aser PV Sindhu na All England Open 2026 nung taoba mapang aiben asayar aliba asayartem den ata lir.

Sen mezüngbuba asaya top-seeded Shi Yu Qi den asayatsü aser Sindhu Thailand tsür Supanida Katethong den asayatsü.

India nung teburtem rongnung tarep asaya nung temaba jenjang nung aliba tarep Satwiksairaj Rankireddy aser Chirag Shetty na mezüngbuba round nung Malaysia nung tarep Kang Khai Xi aser Aaron Tai na den asayatsü. Kasa mapang nung Ayush Shetty tebur kija asaya nung Round of 32 nung Indonesia nung asayar Alwi Farhan den

asayatsü.

Tarep temeyoktep asaya nung Dhruv Kapila aser Tanisha Crasto na Malaysia nung Hoo Pang Ron aser Cheng Su Yin na den aser Rohan Kapoor o Gudde Ruthvika Shivani na France nung tarep Thomas Giquel aser Delphine Delrue na den asayatsü.

Malvika Bansod China nung asayar Chen Yu Fei den asayatsü aser Unnati Hooda-a Thailand tsür eighth-seeded Pornpawee Chochuwong den asayatsü.

Tetsür tarep asaya nung Treesa Jolly aser Gayatri Gopicand na mezüngbuba asaya Japan tsür Sayaka Hirota aser Ayako Sakuramoto na den asayatsü.

Champions League: Bodo/Glimt-i Inter Milan tsükdaktsüogo

Tsüklai/February 25, 2026

(Agencies): Norway club Bodo/Glimt-i Mongolbarnü Champions League nung San Siro nung Inter Milan goal 2-1 agi koka ajak aoksadaktsüogo. Parnoki 5-2 aggregate agi Inter koka round of 16 tongtetogo.

Kasa mapang nung Newcastle United, Atletico Madrid, aser Bayer Leverkusen nungera qualify süogo.

Bodo/Glimt-i mezüngbuba leg asaya 3-1 agi koker liasü. Inter ya taoba season runners-up aser Serie A nung temaba jenjang nung aliba team lir, aser parnoki kidang iba asaya ayong ayonga akoktsü imla liasü. Ajsüka Bodo/Glimt-i asaya tanabuba shilem nung kanga junga asaya-a asaya kokogo.

Inter puri defence nung aibelen ka menaba sülen Jens Petter Hauge-i mezüngbuba goal idaktsü. Iba sülen Hakon Evjen-i tanabuba goal idakja Bodo/Glimt pur aggregate nung 5-1 agi timba aküm. Asaya nung Alessandro Bastoni-i Inter atema goal ka idaktsü, saka aji teperi masü asü.

Bodo/Glimt ya 1997 küm Rosenborg sülen Champions League nung round of 16 atongba Norway team mezüngbuba lir. Parnok takok ya kanga dang jangrademtsüka kechiyong parnok tang off-season nung lir. Norwegian league ya November nung

tembangogo aser March ita-ang tenzüksü.

Parnok taruba asaya Sporting Lisbon mesüra Manchester City den asayatsü.

Kasa asayamung nung Newcastle United-i Qarabag pur mezüngbuba leg nung goal 6-1 akokba sülen tanabuba leg-a goal 3-2 ago koka round of 16 tongtetogo.

Asaya tenzüker mapang tatsüka tsüngda Sandro Tonali aser Joelinton nati Newcastle atema goal kaka idaktsü. Qarabag-ia kanga meranga asaya saka takok asoshi Newcastle-i peria inyakatoker liasü. Parnok Chelsea mesüra Barcelona den asayatsü.

Maneni Atletico Madrid-i kidang 4-1 agi Club Brugge kokogo. Mezüngbuba leg nungbo team ana ya goal 3-3 nung tembanga liasü. Iba asaya nung Norway nung striker Alexander Sorloth-i Atletico atema goal asem idakja liasü.

Atletico-i iba asaya ya 7-4 agi aggregate nung kokogo aser parnok Tottenham mesüra Liverpool den asayatsü.

Bayer Leverkusen-ia mezüngbuba leg nung goal 2-0 agi Olympicos akokba sülen round of 16 tongtetogo. Team ana tsüngda tanabuba leg yabo draw nung tembanga liasü. Parnok taruba asaya Arsenal mesüra Bayern Munich den asayatsü.

BILEMDANGANG

"Na taküm khen dang alitsü, saka khenji junga litetra aji teperi."